

AWEMainta

E DIFERENCIA DEN NOTICIA

HOH ACADEMY TA INICIA RIBA MAL PIA

MANIPULACION CU ‘AANBESTEDING’ LO A PERHUDICA NEGOSHINAN LOCAL



EDITORIAL

3

MIENTRAS GOBIERNO TA BROMA CU
CRECEMENTO DI ECONOMIA Y METANAN SDG
**POBRESA ‘SCONDI’ TA
BIRA MAS Y MAS VISIBEL**

ANALISIS

4

SEGUN BENNY SEVINGER:
**“SISTEMA HUDICIAL
TA CORUPTO”**

‘KERNTAKEN ANALYSE’:

5

**GOBIERNO SA KICO PA
HACI PERO NO TA ACTUA**

Tired of **Manually** Processing Forms?



SCANSYS
vision on imaging

- Digital Processing of Purchase Invoices and more
- Seamless Integration with most Financial Software
- Complete Control of Authorizations via Workflows

VCC
International NV

This OCR software scans any kind of document and automatically fills the data in your preferred financial/ERP software!

TEL. 583-7072 | info@vcc-int.com | www.vcc-int.com

HOH Academy ta inicia riba mal pia

Manipulacion cu ‘aanbesteding’ lo a perhudica negoshinan local

DIABIERNA ultimo Corte Superior a atende e caso Avestruz caminda e tres huesnan a insisti cu NO por permiti manipulacion cu reglanan existente sigur cu reglanan di good-governance y p’e motibo aki a dicidi di aumenta e castigo di Parlamentario Benny Sevinger.

Sinembargo, e sistema hudicial no mester limita su mes na persecucion di politico- y ministernan pero tin cu mira tambe den otro direccinanan, entre otro na institucionnan gubernamental caminda tambe lo por aplica investigacionnan di ‘oplichting’ cu a acusa ex-minister di a haci.

AWEMainta ta referi aki na informacion cu a yega na nos mesa di redaccion na unda ta papia di un desaroyo cu a tuma luga recientemente den e proceso di ‘aanbesteding’ solicita pa Directiva di Horacio Oduber Hospital pa loke ta muebleria p’e centro di educacion y preparacion na un localidad nobo cu lo bay wordo habri dentro di poco, esta HOH Academy.

Un centro caminda tin intencion di entrena, educa y ta destina pa formacion di trahadonan den e sector di cuido medico, cu sin duda ta un necesidad di marca mayor.

Tin varios aspecto di e proceso aki, cu AWEMainta, manera comprondi for di e informantenan, ta haya e impresion cu a dicidi di tene un destaho publico pa ‘laga pasa’ cu directiva a cumpli cu e exigencia di tene un destaho transparente caminda ‘lo a duna’ ‘tur’ negoshi un ‘fair chance.’

Varios negoshi ‘local’ cu tin e capacidad pa participa y realmente ofrece un oferta adecuado segun exigencianan stipula pa directiva di HOH, a dirigi oferta na directiva di hospital y seis dia despues di a inicia e ‘proceso’ transparente aki, pa dia 23 di Juni 2024, a informa companianan local cu HOH lo a tuma un decision.

Mirando e desaroyo aki, AWEMainta tin di remarca cu mester pone duda den un periodo di destaho asina cortico manera cu HOH lo a tuma pa yega na un conclusion y decision, ya cu lo no a organisa sikiera un etapa den cual ta discuti cu tur participante, si nan lo ta dispuesto pa baha nan prijs.

Lo a bay directamente na tuma e decision pa otorga e proyecto n’e compania Hulandes, Gispen, cu lo a entrega su presupuesto for di dia 2 di April 2024 y aki tambe Directiva lo a mostra cu e proceso no tabata uno caminda a duna tur envolvi un ‘fair chance’ ya cu ta parce cu for di un luna y mey caba, HOH tabata sa di e oferta di Gispen cu tambe a forma parti di un proceso cu no ta cuadra cu reglanan y ‘fair trade.’

CONTRA LEY

Directiva di HOH den e asunto aki, lo a informa otro companianan envolvi cu den un periodo cortico di solamente 6 dia, pues ni un siman, a analisa tur prijs cu a drenta caminda lo por conclui cu for di dia 2 di April, prome cu a manda invitacion na otro companianan local, ya lo a analisa tur aspecto di e prijs di e compania Hulandes, pensando kisas cu ‘geen vuiltje aan di lucht’ pero realmente lo ta trata di un proceso di manipula pa laga pasa cu e decision cu a ser tuma, lo ta un decision corecto y cu lo a respeta y honra tur envolvi di a participa den un proceso husto!

Loke ta causa hopi duda riba e grado di igualdad y transparencia den e asunto aki lo t’e hecho cu e compania Hulandes Gispen, cu a participa den e ‘aanbesteding’ y a gana esaki, dia 2 di April di 2024, a entrega su oferta caba na Horacio Oduber Academy bou di e titular di ‘Interieurontwerp’.

Den e documento aki companianan lo a trata practicamente tur aspecto cu tabata necesario cu directiva di HOH a pidi pero negoshinan local, estableci aki na Aruba, lo a ricibi e peticion for di HOH pa entrega e asina yama ‘Request for Proposal’ dia 17 di Mei.

Pues algo increibel caminda e compania Hulandes casi un luna y mei adelanta lo a presenta su oferta na directiva di HOH y e companianan local lo tabatin solamente 5 dia pa confirma nan participacion cu tabata 23 di Mei y riba mesun fecha e companianan local mester a entrega pregunta na HOH relaciona cu e proyecto.

Pues den un plaso di tempo cortico di 14 dia, companianan local lo mester a presenta nan oferta oficial y directiva di HOH 4 dia di trabou despues lo a dicidi cual compania a gana e aanbesteding’!

Sinembargo lo a surgi un atraso di 7 dia di trabou, caminda no a avisa e participantenan y dia 13 di Juni lo a comunica e decision di directiva pero e decision a wordo participa dia 26 di Juni.

En caso cu e proceso a cana di e forma aki, ta nifica cu nunca e proceso aki a cumpli cu reglanan di integridad y lo ta muestra riba un tipo di manipulacion cu simplemente ta inacceptabel y aki un biaha mas companianan local ta wordo perhudica p’e tipo di maniobranan aki cu ta castigabel pa ley!

EDITORIAL

Mientras gobierno ta broma cu crecemento di economia y metanan SDG

Pobresa ‘scondi’ ta bira mas y mas visibel

MIENTRAS Gobierno di Aruba ta broma cu esfuersonan pa cumpli cu e Metanan di Desaroyo Sostenibel (SDGs) pa 2030, un problema urgente di pobreza, considera pa hopi tempo como scondi, awor ta birando mas y mas visibel. A pesar di e esfuersonan di gobierno pa impulsa progreso den direccion di e metanan aki, e realidad di hopi hogar cu ta carece di e fondonan pa cubri necesidadnan basico manera cuminda, awa y coriente ta alarmante.

Na redaccion di AWEMainta ta hopi t’e informacionnan cu ta yega for di, entre otro, maestronan di scol y trahadonan social di muchanan di edad sumamente hoben cu ta busca trabou, of ta pidi ayudo financiero door di pidi placa pafo di establecimentonan local. For di maestronan di scol por tende e desesperacion di studiantenan cu no tin cuminda na cas, na unda cu for di nan mes saco ta cumpra kipashi pan y traha sandwich duna e muchanan aki pa come na scol y hasta pa hiba cas. Diferente fundacionnan cu ta dedica na yuda muchanan di menos recurso ya caba pa añanan, varios biaha a bati alarma, pero ta como si fuera cu ta grita nan ta grita den desierto.

Recientemente un miembro di e team di AWEMainta a encontra un hobencita di 13 aña trahando na un establecimiento di laba auto, dunando e compliment keriendo cu e ta yudando su mayornan den un negoshi di famia, amargo tabat’e sorpresa na momento cu a sali na cla cu e damita aki, tabata trahando pa desconocinan pa por gana un ‘cachi-cachi’ pa yuda na cas, na unda cu e ta biba su so cu su mama, y placa no ta yega pa cuminda, tampoco pa awa ni coriente, y n’e momento ey, tur dos suministro tabata cera.

Mesora a surgi e pregunta, ta cuanto famia mas na Aruba, ta biba n’e grado aki di pobreza, mientras ta gaba nos isla como un isla prospero y feliz? Investigacion riba pagina di instancianan oficial manera CBS.aw no ta muestra cu investigacionnan concreto ariba e tema di pobreza ta wordo realisa. Tin estudionan di composicion di demografia, estado economico di e pais, salud, bienestar, pero nada concreto mustrandu den direccion cu tin bista alguno di e grado di pobreza cu ta existi of no, den nos comunidad.

AWEMainta a tuma contacto cu e dos companianan di utilidad basico, WEB y Elmar, pa haya un indicacion di e cantidad di casnan cu actualmente pa motibo di falta di cumplimento a

keda sin suministro di awa y coriente, dos suministro basico y esencial, conforme e exigencianan SDG.

For di WEB AWEMainta a haya e informacion cu ‘e cantidad di cas of mas bien cliente, cu ta sin conexion di awa ta varia hopi y no por detecta un trend cu esaki a aumenta of bira menos. Esaki tambe ta conta p’e cantidad di arreglo di pago. Por bisa si cu tin cliente cu tin e custumber di warda pa nan ultimo dia di pago pasa prome cu nan cumpli cu nan pago.

Esaki ta clarifica di con e cantidad di cliente cu no ta cumpli ta varia hopi. Clientenan cu no por cumpli cu nan pago, por haci un peticion pa un arreglo di pago.’ Elmar di su banda a indica cu ‘e informacion aki nos lo no por comparti cu boso. Ademá di esey e lo no ilustra loke boso ta desea di compila den boso articulo. Si ta desea pa haci un articulo tocante e problemanan financiero na Aruba tin otro instancianan manera e.o. CBS cu lo por acudi na dje.

Kisas, como medio di prensa, no ta haya relevante pa duna informacion concreto, of kisas tin miedo pa duna esaki pa miedo di represaya of publicidad negativo. Sinembargo, ta hustamente e rol di prensa pa ilustra e situacion real cu ta biba den nos comunidad. Ki bal haci fanfaria cu crecemento di economia? Ki bal atende conferencianan di prensa y publica relatonan na unda ta gaba logronan cu na final di dia no ta pone pan riba mesa pa gran mayoria di poblacion, mientras cu muchanan ta bay scol stoma bashi, y ta cana pidi trabou riba caya cerca hendenan desconoci?!

Na ki riesgo e damita aki ta expone su mes, den su desesperacion pa yuda su mama cu gastonan di cas, trahando riba caya, exponiendo su mes na peligernan cerca hendenan cu no ta ni su famia? Cuanto caso mas tin asina, cu no ta sali na luz di dia?

A bira ora pa na Aruba, no solamente gobierno, pero poblacion completo, stop di purba tapa solo cu un dede. Aruba mester tira un bista honesto riba su problema di pobreza, mobilisa recursonan, y crea intervencionnan specifico pa yuda su hendenan. Solamente door di reconoce e existencia y atende e problemanan fundamental aki, Aruba por spera di haci progreso significativo den direccion di su compromisonan di SDG y sigura un miho futuro pa tur su residentenan.

ANALISIS

Segun Benny Sevinger:

“Sistema hudicial ta corrupto”

SISTEMA hudicial di un pais, ta forma e weso di lomba di democracia di e pais ey y e tin cu wordo respeta y reconoci p’e forma incondicional cu derecho di tur ciudadano ta wordo cubri pa un proceso asina cardinal!

Sinembargo ta algo obvio y un berdad sunu di e sistema hudicial aki, cu su envolvimento den politica di e pais, a haya un otro nificacion caminda pa un of otro motibo y motivacion, institutonan hudicial a dicidi cu ta nan tarea, no di Parlamento, di coregi maneho di mandatarionan di e pais.

Diabierna ultimo un di e institutonan aki riba cual democracia ta sostiene totalmente, esta Corte di Apelacion conoci como HOF, a muestra un cara cu hasta por bisa un tipo di mentalidad cu poco poco ta plamando den e mundo politico y cu realmente nunca mester t’asina.

“Sistema hudicial ta corrupto” ta un expresion haci pa Parlamentario Benny Sevinger despues cu su persona a dicidi di hinca su “derecho” legal den man di HOF, ta bin resulta cu e decision di anula e decision di Hues den Prome Instancia pa dos aña di castigo di cual un aña ta condicional.

Esey un Hues cu a bin for di Hulanda a dicidi y mientras cu Benny Sevinger a dicidi di apela e decision aki, basa riba puntonan cu no tin algo di haber cu su castigo, no uno pero tres Hues a dicidi di cambia henter e proceso dunando e impresion cu nan SI lo gara e politico aki formalmente y mand’e prizon!

Ora c’un ciudadano haci uzo di su derecho pa acudi na un di e instancianan hudicial aki, keriendo cu e lo haya husticia di su banda, e sistema a practicamente perde credibilidad diabierna ultimo, caminda e cambio di HOF den su decision, ta muestra cu a dicidi di castiga un persona pa motibo cu el a vocifera su confiansa den credibilidad di henter e sistema aki.

Ya cu mesun sistema cu a condena Parlamentario Sevinger na dos aña di castigo di cual uno ta condicional, awor mesun sistema ta practicamente muestra tur hende cu e Hues cu a tuma e decision den e proceso den Prome Instancia, a faya barbaramente.

E falta di logica den e dos decisionnan aki, ta muestra cu e expresion di Sevinger despues di e decision di HOF, ta un decision caminda e sistema a dicidi di muestra cu e tin e poder, e tin mandato pa determina con un castigo mester ta, ya cu e decision den Corte den Prome Instancia y esun di HOF diabierna ultimo, ta asina contradictorio cu ta confirma e falta di coherencia den e sistema hudicial aki.

Mirando e mentalidad aki di e sistema hudicial ya caba por anticipa cu e politico Otmar Oduber tambe lo no tin chens pa sali liber di acusacionnan sin base cu el a bin ta cuestiona di henter e proceso contra di su persona.

Analizando un tiki e motivacion di HOF pa impone un cambio asina drastico den e castigo impone pa Corte di Prome Instancia, tin cu muestra cu e tres huesnan den nan decision no tabata asina convincente ya cu practicamente a pone nan bista riba un envelop cu un ciudadano lo a hiba na Benny su cas.

Un envelop den cual lo tabatin miles y miles di biyete loke abogado di Sevinger a muestra cu NO por hinca un suma asina grandi den un envelop asina chikito pero e tres Huesnan di HOF pa un motibo of otro a dicidi di gara e posibilidad aki cu man fuerte loke a bin resulta den aumento di e castigo pa Sevinger.

Ningun oficial di Ministerio Publico of di Cuerpo Policial a mira e suma di placa aki y ta trata aki di un declaracion di un solo persona y HOF tampoco a haya evidencia unda e suma aki a bay of kico a haci cu esaki pero a dicidi di castiga Sevinger y a lubida por completo e dicho cu ta bisa: “een getuige is geen getuige.” Ni Landsrecherche of Ministerio Publico a yega di mira e suma aki den e envelop y den cierto forma no sa cu e placa aki a yega di existi.

Diabierna husticia no a wordo sirbi p’e institucion hudicial aki pero si a percura pa aumenta ainda mas e duda grandi cu henter e sistema hudicial a bin ta acumulando den ultimo 7 añanan!

‘Kerntaken Analyse’: Gobierno sa kico pa haci pero no ta actua

DEN un tempo di retonan economico y e necesidad urgente pa un maneho di gobierno mas eficiente, ta parce cu gobierno di Aruba sa e pasonan necesario pa tuma, pero no ta actuando riba nan. E analisis di tareanan principal (kerntakenanalyse), un evaluacion profundo di e serviccionan di gobierno pa identifica gastonan innecesario y priorisa, mester a hunga un rol esencial den e reforma di e servicio publico. Desafortunadamente, accion ta keda ausente, probablemente pa motibonan politico.

A pesar di e beneficiacion obvio di un analisis di tarea principal – manera uzo mas eficiente di recursonan y haci gobierno mas smal y efectivo – gobierno ta keda duda den tuma accion. E analisis aki lo a yuda determina cua funcionnan di gobierno ta esencial y cua por wordo restructura of privatisa. Sinembargo, en bes di ehecuta e reforma necesario aki, gobierno ta parce di scoge cada bes p’e status quo, posiblemente pa proteha interesnan politico.

No ta un secreto cu pa añanan largo politiconan na Aruba a yena e aparato gubernamental cu campañadonan of simpatisantenan. No solamente dunando trabou pero hopi biaha den un funcion cu nan no ta capacita pa eherce y esaki a conduci na serviccionan mediocre den varios departamento. P’e motibo aki mes ya caba algun aña atras a laga haci un kerntaken analyse pero esaki no a conduci na cambio. Ora a firma y presenta e ‘Landspakket’ tambe a indica cu mester haci algo cu e aparato gigantesco di gobierno, cual tampoco no a haya oido. E motibo ta mas sigur pa falta di curashi y falta di vision pa futuro y miedo di perde voto.

A pesar di cu e tema aki no ta algo nobo, y cu den tur gabinete anterior tambe a wordo menciona na diferente ocasion, e falta di medidanan di austeridad concreto basa riba un analisis di tarea principal ta preocupante. En bes di reduci of restructura serviccionan di gobierno pa baha gasto, e diferente gobiernonan ta parce di ta wanta na structuranan ineficiente. Esaki ta a pesar di e conocimiento cu door di enfoca riba serviccionan esencial y uzo mas eficiente di recursonan, por realiza un reduccion di gasto significativo sin reduci e calidad di e servicio. E escogencia pa no actua ta sugeri un prioridad di consideracion politico riba e interes general.

Lastimamente e problematica aki no ta mara n’e

gobierno reinante solamente, e ta parce di ta un mentalidad ancla den tur partido politico na Aruba, haciendo e problematica hopi mas compleho cu mester ta. Esaki ta nifica cu no obstante den futuro bin cambio den gobernacion of no, no tin garantia cu lo tin e capacidad di tuma decisionnan importante pa haci e cambionan necesario pa eficiencia den e aparato gubernamental.

Na final di dia tur politico ta consciente cu nan puesto ta depende di voto y ningun di nan kier perde esaki. Kisas ta solamente un team di profesional independiente lo por maneha Aruba sin sinti e presion di un deber politico, y lo por tuma e reforma na serio cu un vision pa futuro y no solamente p’e siguiente eleccion. Reforma cu solamente por ta posibel door di un analisis di tarea principal, cu n’e momentonan aki ta wordo blokia pa inercia politico. Gobierno conoce e caminda pa un estructura di gobierno mas eficiente y sostenibel, pero ta prefera di mantene gastonan innecesario y pospone cambionan necesario.

E falta di accion aki ta perhudica e progreso di Aruba y ta mina e bienestar di su ciudadanonan. E poblacion merece un gobierno cu ta actua di berdad y ta ehecuta e reforma necesario, en bes di pone interesnan politico prome cu tur cos.

BECAUSE YOU CAN'T
WAIT UNTIL DECEMBER

CHRISTMAS

IN JULY

Get into the festive spirit early with
our Christmas in July celebrations
at Aquarius Restaurant.

Join us for two days of holiday
cheer, delicious food, and
entertainment.

Saturday July 20th, 2024

All you can eat Christmas Dinner
for \$65 pp +15% s.c

Sunday July 21st, 2024

All you can eat Christmas Brunch
for \$55 pp +15% s.c

Book your table now by calling 5236165 or
Aquariusreservation@arubarenaissance.com
and make your July merry and bright!

AQUARIUS

Minister Rocco Tjon a confirma cu SVGA lo ricibi suficiente fondo

Pa paga indexering pa tur trahadonan desde juli 2024

E preocupacion bou di trahadonan di Stichting voor Verstandelijk Gehandicaptten Aruba (SVGA) pa cu e indexering ta soluciona. Diabierna siman pasa Minister a confirma, durante un reunion cu algun fundacion, cu e peticion di SVGA pa pidi extra subsidie pa paga indexering na trahadonan ta corecto.

Minister lo duna opdracht na Directie Financien pa paga SVGA e suma necesario extra pa 2024 pa cubri e gastonan di 6% indexering.

Ademas Minister a declara cu pa 2025 lo pone suficiente fondo disponibel riba begroting di Pais Aruba pa paga e indexering di 5.7% na januari 2025. Logicamente ta falta ainda e aprobacion di Parlamento di e begroting di Pais Aruba 2025.

Algun di nos clientenan a keda un rato sin haya cuidio diahuebs mainta siman pasa dor di e protesta di algun trahadonan. SVGA ta lamenta cu mester a yega asina leu cu cliente y nan mayornan a sali perhudica.

HOH orguyoso di ta parti di aliansa importante aki

Reunion fructifero educadornan di hospitalnan di Caribe Hulandes

RECIENTEMENTE a bini hunto e diferente educadornan di hospitalnan y centronan di cuidio di Caribe Hulandes p'asina celebra un logro grandi. Danki n'e colaboracion cu Amstel Academie, Dutch Caribbean Hospital Alliance (DCHA) y Ministerio di Salud Publico, Bienestar y Deporte (VWS), a logra educa 1500 profesionalnan di cuidio den e region Caribe Hulandes. Ademas, e educadornan di hospital a formula diferente plan pa futuro p'asina dun'e colaboracion un caracter sostenibel.

Desde 2021, e educadornan di diferente hospital y centronan medico na Aruba, Boneiro, Corsou, Sint-Eustatius, Sint-Maarten y Saba a uni forza. Danki n'e colaboracion cu Amstel Academie, DCHA y subsidio di Ministerio di VWS, enseñansa avansa den cuidio a bira posibel. Esaki tabata fondo specialmente reserva pa educacion relaciona cu cuidio agudo, p'asina e islanan ta miho prepara den momento di crisis, manera un pandemia. Inventarisacion y investigacionnan a wordo haci y a tene hopi reunion cu tur partner pa por a logra esaki. E proyecto cu ta hiba e nomber Caribbean Health Academy (CARIBHA) a logra educa 1500 profesionalnan di cuidio den loke ta 'kinisch redeneren' y tambe nurse specialisa den emergencia, IC-, CCU, nurse specialisa den diabetes, anestesia, etc.

Debido n'e colaboracion exitoso entre e educadornan di hospital CAS-BES, a tuma e decision pa reuni fisicamente pa evalua e cooperacion actual, celebra e logronan y papia tocante futuro colaboracion. P'e reunion aki Fundashon Mariadal Boneiro (FM) a pone su hospital na disposicion y Horacio Oduber Hospital Aruba (HOH) tabata encarga cu organisacion di e dianan intensivo aki. Durante dos dia largo, Amstel Academie a tene sesionnan di evaluacion y inspira-



cion, despues di cual HOH a carga un sesion di strategia y vision solamente cu e educadornan pa traha riba e plannan pa futuro.

Nos a evalua hunto e necesidadnan di educacion p'e añanan venidero p'asina hunto adkiri e diferente cursonan aki cu tin tambe como beneficio bahamento di gasto y claro mantene e conexion entre e islanan. Ademas, e educadornan a duna presentacion riba desaroyonan di enseñansa riba nan isla cu por ta un inspiracion pa otro.

E evento a finalisa cu un celebracion, unda un parti grandi di esnan involvi a tene un discurso. E presidente di e aliansa aki, profesor Lenie Denteneer di HOH Academy, a habri e celebracion, despues a sigui presidente di DCHA, dokter Giovanni Frans di Fundashon Mariadal y tambe VWS pa medio di un mensahe di video a manda solamente palabra di aprecio p'e tremendo cooperacion aki.

Amstel Academie a cera e evento y a refleha riba e progreso enorme cu nan a logra hunto den tur e añanan. Finalmente, tur presente a brinda p'e tremendo cooperacion y pa tur loke tin planea pa logra hunto den futuro.

Deterioro social:

Norma y balornan como escudo conveniente

MEMEY di loke algun hende ta considera un deterioro di norma y balornan social, e wega di culpa ta bira mas intenso, unda normanan y balornan hopi biaha ta wordo uza como un capa facil. E reflexion aki ta enfoca riba e personanan cu aparentemente ta uza e principionan aki solamente ora ta cumbini nan.

Responsabilidad Individual:

Ora e dedenan acusado ta muestra den diferente direccion, e rol di e individuo den cumpli of desvia di e normanan ta central. Hopi biaha ta muestra riba comportacion consciente, pero solamente ora ta cuadra cu nan propio interes. En bes di ta consistente, ta parece cu e normanan aki ta bira mas flexibel segun e situacion ta cambia.

Influencia Cultural y Institucional:

E cuadro social, forma pa nuance cultural y structuranan institucional, mester hunga un rol crucial den mantene normanan y balornan. Sinembargo, ta parece cu e structuranan aki hopi biaha ta wordo menciona solamente ora ta cumbini, disminuyendo nan credibilidad y efectividad. Ta facil pa tira culpa riba institutonan cu ta faya, sin tuma responsabilidad propio.

E Rol di Media y Tecnologia:

E presencia omnipresente di media y tecnologia hopi biaha ta wordo mira como esnan culpabel pa desviacion di normanan estableci. E plataforma aki ta wordo acusa di redefini balornan, pero na mes momento ta wordo uza cu entusiasmo pa fortalece opinionnan propio. E facilidad cu cual hende ta uza e herment aki pa pusha nan propio agendan, ta ilustra e hipocresia den e uzo di norma y balornan.

Diferencia Generacional:

E conflicto entre generacionnan hopi biaha ta wordo presenta como un splicacion pa cambianan social. Mientras generacionnan mas bieu ta keha tocante e perdida di balor, hobennan ta uza e mesun argumentonan pa hustifica nan propio normanan. Ambos grupo

ta parece di ta uza e diferencianan como excusa, en bes di entabla un dialogo real.

Responsabilidad Colectivo:

E tehido social mester wordo manteni hunto, pero hopi biaha responsabilidad colectivo ta wordo menciona solamente ora ta trata di otro hende. Norma y balornan ta wordo treci dilanti ora ta cumbini, pero casi nunca ta wordo aplica consistentemente. Esaki ta crea un sociedad fragil, construi riba moralidad selectivo.

Den e reflexion aki ta bira cla cu norma y balornan hopi biaha ta wordo uza como un escudo conveniente pa sconde tras di dje ora ta cumbini. Mientras e sociedad ta lucha cu e supuesto crisis aki, cada faceta di nos existencia ta wordo poni bao di un luz selectivo, pidiendo un aplicacion mas honesto y consistente di e principionan cu nos ta bisa di ta balora asina tanto.



Beauty Bar
by Jen

+297 730 1486
SABANA BLANCO 40
ORANJESTAD, ARUBA

Beauty Bar
P.M.U &
LASH ARTIST **By JEN**

Specialised in

Brows, lips & Eyeliner ♦ Pedicure ♦ Microblading
♦ Powderbrows ♦ Threading ♦ Brow Lamination
♦ Lip pigmentation & blush ♦ Eyeliner

f Beauty Bar by Jen @ beautybar_byjen

Diasabra anochi

Entrada di un Meteor Fireball aki na Aruba

PA medio di e comunicado aki Aruba Astro Research Int. asociacion nacional Arubano di astronomia e instancia y autoridad oficial ariba e tereno di astronomia como tambe e tereno di ufologia aki na Aruba pa medio di su presidente Sr. Marcos Bislip astronomo, ufologo, parasicologo, analista di video, potret, audio, astrofotografo y investigador ta informa oficialmente na comunidad cu loke a tuma luga *diasabra anochi dia 13 di Juli 2024 pa exactamente 7:50 pm* di anochi na Aruba ta un entrada di un METEOR FIREBALL.

Un meteor fireball conoci na papiamento como bola di candela den shelo di un meteoor ta restante di un pida piedra mas grandi cu normal di un Cometa cu ta drenta kima den atmosfera y cu no por wordo anticipa delanta. Nos planeta tera ta pasa den pasada di un cometa y e restantenan ta drenta kima y genera un yobida di meteoornan mas chikito.


Den e caso di Diasabra anochi Dia 13 di Juli 2024 un meteor fireball un bola di candela di un meteoor a drenta y kima den shelo te ora e la caba na nada.

Na prome instante hopi a kere cu ta un asteriod y otronan e 20 satelitenan di Starlink tur dos no tabata e caso. Nos di Aruba Astro Research Int. via nos centro di observacion ATSOC Aruba Time & Space Observation Center mesora a bay investiga loke a tuma luga y a bin sali na cla cu ta un bola di candela di un meteoor un 'meteor fireball'.

Aruba Astro Research Int. y centro di observacion ATSOC ta dispone di un experto den e tereno pa observa y analisa eventonan asina. Analisando tur e videonan ricibi for di tur parti di Aruba y tambe di Corsou y tambe di ATSOC su propio camaranan Aruba SkyCam a bin haya e resultado final cu e ta un meteor fireball.

Prome a check e data di e dos asteriodnan cu a pasa cerca 2024 NG y 2024 NB2 na 3 miyon di km cu no a drenta atmosfera di tera y di dos a check e re-entrada di e 20 satelitenan di Starlink y otro re-entradan no tabata tin nada. Mientras cu for di Diahuebs caba e SpaceX Falcon 9 a sufri un fayo cu e 20 satelitenan di Starlink cu no a drenta kima tampoco Diasabra anochi.

Mientras cu Diahuebs anochi a drenta tambe un meteor fireball na Merca na Wisconsin y otro ciudadnan na Merca. E investigacionnan cu nos y ATSOC a haci ta cu e meteor fireball ta conta cu tur e componente kimico esta color oranje cu ta sodium, geel hero, berde magnesium, blauw copper. Algun di e componente kimico cu ta muestra cu e ta un meteor



fireball tambe con e la drenta y kima y bira oranje prome cu e la caba na nada esey ta sodium.

Aruba Astro Research Int. tin aparatonan pa investiga si e restantenan di un meteoor por cay ariba tera. Aruba Astro Research Int. via centro di observacion ATSOC ta monitoria espacio via di camaranan. Tin un diferencia grandi ora un bola di candela meteoor drenta kima y un satellite of restantenan di un satellite eynan tambe nos por sa si e ta un satellite of resto for di den espacio.

Entrada di un meteor fireball, bola di candela di meteoor ta un masa solido ta drenta kima y un satellite y restante di obhetonan den espacio oranan drenta nan ta drenta kima pida pida.

Pa cualkier informacion di un evento of pa reporta un evento por contact Aruba Astro Research Int. Sr. Marcos Bislip na tel: 5629407 of e-mail nos na arubaastroresearch@gmail.com

Bishita nos facebook webpage di Aruba Astro Research Int. pa mas informacion.



Mirrors Beauty Academy ta ofrece e siguiente servicjonan

Laba	Tinja	Makeup	Y mucho mas!
Corta	Highlights / Mechitas	Threading	
Blowdry	Ombre / Californiana	Barberia	
Keratina	Bayalage	Manicure	
Cold Wax	Peinado	Pedicure	

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Cientificonan ta identifica posibel causa principal di lupus

Habriendo caminda pa tratamento nobo



INVESTIGADONAN di Northwestern Medicine y Brigham and Women's Hospital a descubri un posibel causa principal di lupus, un di e malesanan autoinmunologico mas comun, potencialmente habriendo portanan pa tratamento nobo. E estudio, publica den e revista Nature, ta destaca un desbalansa di celnan T den pashentnan cu lupus, ofreciendo comprendemento nobo riba e desaroyo di e malesa.

Lupus ta afecta miles di hende na Merca, cu sintomanan cu ta varia di cansancio extremo y dolor di 'joint' te 'rash' di cuero y, den casonan severo, daño na riñon of curason. Historicamente, e malesa tabata dificil pa trata, cu hopi terapia cu ta suprimí e sistema inmunologico den un forma general, hopi biaha cu efectividad limita.

E estudio a compara muestranan di sanger di 19 pashent di lupus cu esnan di individuonan saludabel, revelando cu pashentnan di lupus tin un exceso di un tipo di cel T asocia cu daño celular y un deficiencia den un tipo di cel T crucial pa reparacion. E desbalansa aki ta conecta na un proteina yama interferon, cu, den exceso, ta blokia e receptor di aryl hydrocarbon cu ta regula reaccion na bacteria y contaminantenan. E blokeo aki ta stroba e produccion di celnan T cu ta promove reparacion, mientras ta stimula e creacion di autoanticuerpo, un característica di lupus.

Dr. Deepak Rao, un di e autornan di e estudio, ta sugeri cu e desbalansa aki por splica mayoria di e casonan di lupus. Sinembargo, expertonan manera Mara Lennard Richard di e Lupus Research Alliance ta adverti cu ta prematuro pa declara esaki e unico causa di lupus, citando e variedad di sintomanan y factornan contribuyente di e malesa.

E estudio tambe a explora tratamento potencial. Administrando anifrolumab, un remedi cu ta blokia interferon, a coregi e desbalansa di cel T den pashentnan di lupus. Ademas, activando e receptor di aryl hydrocarbon den muestranan di sanger a limita celnan T cu ta promove e malesa. A pesar di e resultadonan prometedores aki, Dr. Jill Buyon di NYU Langone Health ta remarca cu estudionan mas amplio ta necesario pa confirma e descubrimientonan y cu un solo tratamento lo no por funciona pa tur pashent di lupus.

E investigacion innovado aki ta brinda speranza pa tratamento mas concreto y efectivo pa lupus, aunke mas investigacion y pruebanan clinico ta necesario pa compronde y aplica e descubrimientonan aki completamente.

APPAREL

BOAT ACCESSORIES

Facebook: TodomarAruba
Twitter: @TodomarAruba
Instagram: TodomarAruba
Phone: +297 585 0555

FISHING TACKLE

FIBERGLASS PRODUCTS

Segun informe di Nacionnan Uni

Poblacion mundial proyecta pa alcanza su maximo na 10.3 Biyon den 2080



E poblacion global ta proyecta pa alcanza un estimado di 10.3 biyon hende p'e decada di 2080, segun un informe nobo di Nacionnan Uni. Esaki ta un aumento significativo for di e poblacion actual di 8.2 biyon.

E informe a destaca varios tendencia clave, incluyendo un proyeccion revisa p'e fin di siglo, cu awor ta wordo spera di ta 6% mas chikito cu e estimacion di un decada pasa. Notablemente, un den cada cuater persona na mundo ta biba den un pais unda e poblacion ya a yega su punto maximo. Esaki ta inclui 63 pais unda e poblacion a yega su maximo prome cu 2024, manera China, Alemania, Hapon, y e Federacion Ruso.

Historicamente, a tuma humanidad cientos di miles di año pa alcanza un poblacion di 1 biyon. Sinembargo, e poblacion a crece shete biaha den mas o menos dos siglo, pasando e marca di 7 biyon na 2011. E aumento dramático aki a wordo impulsa pa un tasa di sobrevivencia mas halto te na edad reproductivo, urbanisacion, y migracion riba gran escala.

Predici e tamaño di poblacion futuro ta encera incertidumbrenan significativo. Por ehempel, e Oficina di Censo di Merca a estima cu e mundo a yega 8 biyon hende september pasa, mientras cu Nacionnan Uni a marca e momento aki casi un año prome.

E informe tambe ta subraya un cambio demografico significativo: e poblacion global ta birando mas bieu. Pa 2080, hendenan di 65 año y mas ta spera di surpasa esnan di 18 año y menos, cu e grupo di hende grandi proyecta pa alcanza 2.2 biyon. P'e decada di 2030, e cantidad di hende di 80 año y mas lo surpasa e cantidad di baby.

Na Merca, cu actualmente tin 341.8 milyon hende, crecimiento di poblacion ta spera di continua te e decada di 2050. California ta keda e estado mas pobla, sigui pa Texas, mientras cu New York City t'e ciudad mas pobla. Crecemento recién a wordo concentra den e parti sur, particularmente na Texas y Florida, cu a mira aumentonan significativo den poblacion entre 2022 y 2023.

Hackernan di Noord Korea a manda Crypto horta pa un Wallet uza

Pa un compania di pago Asiatico

UN compania di pago importante di Cambodia, Huione Pay, a ricibi mas di \$150.000 den cryptomonedas for di un cartera digital conecta cu e grupo di hacker di Noord Korea Lazarus, segun datonan di blockchain revisa pa Reuters. E transaccion aki ta duna un bista di con e colectivo criminal ta laba placa den zuidoost di Asia.

Estableci na Phnom Penh, Huione Pay ta ofrece cambio di divisa, pago y serviccionan di 'remittance'. Entre juni 2023 y februari di e aña aki, e compania a ricibi crypto for di un cartera anonimo uza p'e hackernan di Lazarus, cu a horta fondonan di tres compania di crypto—Atomic Wallet, CoinsPaid, y Alphapo—mayoria biaha a traves di atakenan di 'phishing'. E FBI a atribui e hacknan aki na Lazarus, bisando cu e grupo a plunder mas o menos \$160 milyon.

E cryptomonedanan horta ta permiti Noord Korea pa evadi sancion internacional, financiando su producto y serviccionan prohibi, manera nota p'e Royal United Services Institute. A pesar di cu e hunta di Huione Pay ta declara cu nan no tabata sa di e origen ilicito di e fondo, hermentnan di analisis di blockchain ta sugeri cu companianan por identifica cartera di alto riesgo pa preveni tipo di interaccionnan asina.

E hunta di Huione Pay, cu ta inclui Hun To, un primo di e Prome Minister Hun Manet, a declara cu Hun To no ta supervisa operacionnan diario. E Banco Nacional di Cambodia (NBC) ta prohibi companianan di pago di trata cu cryptomonedanan, citando riesgonan manera volatilidad y labamento di placa. E NBC a indica potencial medidanan corectivo contra Huione Pay.

Transaccionnan di cryptomonedas, aunke anonimo, ta rastreabel riba e blockchain. E compania di analisis di blockchain Mericano TRM Labs a confirma cu Huione Pay a ricibi un mayoria di e cryptomonedanan horta den e hack di Atomic Wallet. E hackernan a converti e fondonan horta den tether (USDT) riba e blockchain di Tron, conoci pa su velocidad y costo abou.

Nacionnan Uni a raporta anteriormente cu Lazarus a comparti rednan di labamento di placa cu criminalnan di zuidoost di Asia. Jeremy Douglas, anteriormente di e Oficina di Nacionnan Uni contra Droga y Crimen, a destaca e prevalencia den e region di proveedornan di servicio di crypto sin



regulacion cu ta actua como 'banconan clandestino'.

E banco central di Cambodia actualmente ta trahando riba regulacionnan pa atende e uzo di crypto pa actividadnan ilegal, cu e meta di mehora su maneho di anti-labamento di placa. E incidente aki ta subraya e retonan continuo den combatimento di labamento di placa high-tech y crimen cibernetico den zuidoost di Asia.

Stimami. Sterilisami.

REGISTRA AWO

Y BENEFICIA DI NOS SUBSIDIO CU TA
CUBRI TE CU 45% DI E COSTO DI
STERILISACION DI BO MASCOTA Y UN
MICROCHIP GRATIS!

PA MAS INFORMACION BISHITA:
WWW.STIMAMISTERILISAMI.COM

DEPORTE

deporte@awemainta.com

Yemirson Contreras ta empleado superior di Aruba Bank

YEMIRSON Contreras ta empleado superior di Aruba Bank pa luna di juni 2024. Un empleado cu a demostra dedicacion y iniciativa sobresaliente, logrando asina e reconocimiento aki.

E compromiso di Yemirson pa semper brinda un experiencia superior na e clientenan di Aruba Bank cu ta refleha e balornan di e banco. Su accionnan ta impacta e clientenan positivamente y ta pone un standard halto pa e excelencia di servicio na cliente.

Den su tempo liber, Yemirson ta practica e deporte di futbol. Pa Yemirson esaki ta su pasion y ta super entusiasmo ora e ta riba veld. E resultado fisico como tambe mentalmente ta un plus punt cu ta dune e empuhe y amor pa futbol pa sigui practica su pasion.

Pabien Yemirson pa ta un empleado ehemplar cu ta forma parti di Aruba Bank.



Prome dia di training pa team di Equitacion na Aruba



DIALUNA mainta e seleccion di Equitacion di Aruba a drenta pista na Coliseo Marcelo Trujillo Panisse na Humacao, Puerto Rico. Esaki t'e prome dia di training caminda nan por a practica den e pista caminda e competencia lo tuma luga. Lo sigui dos dia mas di training, terminando diaranson pa despues e Mundial di Equitacion Felix Santiago Oliver por cuminsa cu mas di 200 participante. Dialuna atardi tur participante riba 12 aña tambe lo mester haci un examen di teoria, p'asina nan por participa.



Cu e di 15 pick den draft di MLB

Mariners ta scoge pitcher ambidextro Jurrangel Cijntje



DEN e draft di MLB 2024 riba diadomingo, Seattle Mariners a scoge e pitcher ambidextro Jurrangel Cijntje di Mississippi State University cu e di 15 escogencia general. Cijntje, clasifica como e prospecto #25 di MLB Pipeline, ta un adicon unico na un organisacion conoci pa su pitcheo fuerte bou presidente di operacionnan di baseball Jerry Dipoto.

Cijntje ta un pitcher ambidextro, capaz di tira cu tanto su brasa robes como drechi efectivamente. El a yega velocidad di 95 mph cu su brasa robes y 99 mph cu su brasa drechi, demostrando su versatilidad. Durante su segundo año na Mississippi State, el a poncha 113 bateadonan den 90 2/3 inning, mantenendo un ERA di 3.67.

E director di scouting amateur di Mariners, Scott Hunter, a expresa entusiasmo tocante e potencial di Cijntje. “Nos ta bay laga Jurrangel tuma e decision ey pa cuminsa”, Hunter a bisa. “Tin un bentaha grandi si e haci ambos. Ta mas tocante kisas scoge enfrentamento y wak con e ta funciona den e Liganan Menor. Pero definitivamente e ta un opcion cu ta riba mesa pa sigui cu esaki.”

E habilidad di Cijntje pa tira cu ambos brasa ta haci’e un talento raro. E ta tira normalmente cu man robes na bateadornan zurdo y man drechi na bateadornan drechi, aunke el a ahusta su enfoke na 2024, tin biaha tirando man

drechi contra zurdonan. “El a pone e glove di man robes abou pa un rato, y e ultimo cuater of cinco apertura di año tabata basta electrico,” Hunter a agrega.

Segun e reglanan di MLB, un pitcher ambidextro mester indica cua man e lo uza prome cu un turno na bate y no por cambia man durante e turno na bate a menos cu un lesion sosode. Si e ta lesiona, e por cambia man pero no por uza e man lesiona pa e resto di e wega.

Den e di dos rond, Mariners a scoge e pitcher derecho di scol secundario Ryan Sloan cu e di 55 escogencia general. Cu e seleccionnan strategico aki, Mariners ta sigui fortalece nan roster di pitcheo, kedando fiel na nan reputacion pa desa-roya brasanan fuerte.

MADBOR Consultancy

Documento Comercial y Support

- Oferta / Presentacion
- Programa di rekisitonan
- Citacion
- Informacion
- Contrato (den concepto)

Operacion

- Analisis di Proceso
- Descripcion di Proceso
- Descripcion di Protocol

Apoyo Empresarial

- Mediacion
- Consulencia/ Consejo
- Comercialisacion

Documentacion oficial (di e empresa):

- Prepara
- Verifica
- Traduccion-4 idioma:
(Ingles, Hulandes, Spaño, Papiamentu)

Priva

- Scirbi carta (oficial) - 4 idioma
- Traha Curriculum Vitae
- Carta di solicitud
- Mediacion serca instancianan - 4 idioma

Turning Ideas into Breakthrough Solutions

Ban Papiá
+297-7456724

Ciclista Egipcio prohíbi di participa na Weganan Olimpico pa pusha competido



E ciclista Egipcio Shahd Saied lo no competi den e Weganan Olimpico di Paris despues di un decision di e Comité Olimpico di Egipto. E atleta di 19 aña a wordo kita for di e lista Olimpico despues di un incidente durante e campeonatonan nacional unda el a wordo acusa di pusha un competido.

Inclusion di Saied den e ekipo Olimpico diamars pasa a bin como un sorpresa, mirando su suspension di un aña na Egipto. E suspension tabata resultado di un incidente controversial na april durante e campeonatonan Egipcio. Imagennan capta riba video a mostra Saied ta dal den e ciclista rival Ganna Eliwa, causando cu Eliwa a cay y sufri


un contusion cerebral y un clavícula kibra. Eliwa a acusa Saied di a push'e deliberadamente, un acusacion cu Saied a nenga, declarando cu tabata un accidente. Apesar di a nenga, Saied a wordo duna un suspension di un aña.

Inicialmente, e suspension a aplica solamente pa competencianan local, permitiendo e Federacion di Ciclismo di Egipto pa inclui Saied den e ekipo Olimpico. E Federacion a hustifica nan decision bisando cu Saied a cualifica pa e Weganan Olimpico prome cu e incidente cu Eliwa.

Sinembargo, e Ministerio di Deporte di Egipto no tabata di acuerdo cu e decision aki y a pidi e Federacion di Ciclismo pa reevalua e proceso di seleccion. Diadomingo, e Comité Olimpico Egipcio a anuncia cu Saied no lo wordo permiti pa competi na Paris, implementando e suspension riba competencianan internacional tambe.

Saied ta relativamente desconoci den e comunidad di ciclismo y su debut Olimpico tabata hopi anticipa. E Weganan Olimpico di Paris ta programa pa cuminsa cu e ceremonia di apertura diabierna, 26 di juli.

E decision aki ta subraya e adherencia estricto na standard di deportividad y fair play, sigurando cu atletanan responsabel pa nan accionnan ta enfrenta consecuncianan adecua. E decision di e Comité Olimpico di Egipto tin como meta pa mantene e integridad di e deporte riba e plataforma internacional.



E caminata di cuater dia di Nijmegen di e aña aki ta cubri 86 nacionalidad



E 'Nijmeegse Vierdaagse', of caminata di cuater dia di Nijmegen, a cuminsa awe diamars pa 4'or di mainta, marcando su edicion number 106. E aña aki, alrededor di 47.000 participante a inscribi pa e evento, mustrand un presencia internacional remarcabel cu canadonan di 86 diferente nacionalidad. Pa prome biaha, delegadonan di Burkina Faso y Noord Macedonia ta uni na e marcha.

Participantenan lo cana door di e region pintoresco di Betuwe, conoci pa su cultivo di fruta, cubriendo distancia diario di 30, 40, of 50 kilometer, dependiendo di nan edad y ambicion. E evento ta atende un grupo diverso di canado, cu e edad promedio di casi 48 aña, y 60% di e participantenan ta hende homber. Entre e canadonan, 17.200 ta participa pa prome biaha, y 14 persona tin como meta pa completa e ruta uzando rolstoel. Notablemente, e grupo ta inclui cinco canado cu ta mayor di 91 aña.

Un contingente significativo di mas di 6.400 solda di 34 diferente pais tambe ta participa, poniendo enfasis riba e connexion militar historico di e evento. E prome Vierdaagse a tuma luga na 1909, ora 306 participante masculino, mayoria personal militar, a cana 35 kilometer pa dia durante cuater dia cuminsando for di 10 diferente guarnicion di ehercito den e pais. Eventonan di cuater dia tabata particularmente popular durante e epoca ey.

E Marcha di Cuater Dia di Nijmegen tin un historia rico. Na 2022, e evento a wordo acorta na tres dia debi na calor extremo, resaltando e desafionan causa pa condicionnan climatico. Ademas, e marcha a wordo cancela na 2020 y 2021 pa motibo di e pandemia di corona virus, reflehando e impacto global di e crisis di salud.

Mientras cu e canadonan ta prepara pa embarca e caminata di e aña aki, e evento ta sigui ta un testimonio di perseverancia, camaraderia, y union internacional. Participantenan y espectador por igual ta sperando un marcha exitoso y memorabel door di e paisahe pintoresco Hulandes.

BREAKFAST LUNCH
JUNGLE
Cafe

COME IN WE'RE OPEN

CAYA HARMONIA 1. LOKAAL 2
NOORD (PATRAS CITGO SASAKI)


Designed by **@junglecafe**

CULTURA Y HISTORIA

Aruba: Nos Rikesa

Maishi Rabo:

Un pilar di cushina y agricultura di Aruba



MAISHI rabo, tambe conoci como *Sorghum bicolor*, ta un grano versatil y integral den e cushina tradicional di Aruba. Localmente e ta wordo yama ‘Maishi rabo’ of ‘Maishi Chikito’, e grano aki ta central den varios plato, incluyendo e popular ‘pan bati’ y ‘papa di maishi rabo’.

Pan bati (di maishi rabo) ta un pan plat tradicional di Aruba traha door di mescla hariña di maishi rabo cu hariña di maishi, baking powder, lechi of awa, y un tiki sucú y salo. E mescla ta wordo cushina riba un plancha, similar na pancake, y hopi biaha ta wordo sirbi cu sopi, stoba, of pisca, brindando un acompañamento nutritivo y yen di sabor. Un otro plato stima, papa di maishi rabo, ta encera cushina e hariña di maishi rabo cu lechi, awa, sucú, y un tiki salo pa crea un consistencia manera papa (Quaker). E plato aki ta wordo disfruta como un desayuno substancial of un acompañamento, tin biaha e ta wordo haci mas dushi cu canela of honing.

Maishi rabo no solamente ta wordo balora pa su uzonan culinario pero tambe pa su beneficianan nutricional. Rico den

proteína, vitamina, y mineralnan, e ta un adición saludabel n’e dieta di Aruba. Su resistencia y adaptabilidad n’e clima di Caribe a haci’e un pilar den e region pa siglonan.

E temporada di plantacion pa maishi rabo generalmente ta cuminsa den e fin di primavera pa cuminsamento di zomer ora e temperatura ta constantemente cayente. Na Aruba, e tempo optimal pa plantacion ta tipicamente fin di Mei of cuminsamento di Juni, como cu maishi rabo ta crece miho den temperatura riba 27°C y ta prefera solo completo.

E simianan mester wordo sembra directamente den tera cu bon dreñahe mas o menos ¼ inch profundo y separa 8 pa 12 inch for di otro. Control efectivo di yerba ta esencial durante e estadia tempran di crecimiento pa sigura un desa-royo saludabel.

Maishi rabo ta relativamente facil pa cultiva y ta rekeri mantencion minimo unavez estableci. E ta wordo uza pa cuminda, forashi, y hasta materialnan di construccin, must-rando su versatilidad y importancia.

TENDENCIA

Shete manera creativo pa renoba bo jeans bieu of kibra

TUR prenda ta bira bieu, hasta nos paña faborito. Den e caso di jeans, ta hopi simpel pa duna nan un di dos bida aunke nan ta kibra of cu buraco. Lo unico cu nos mester, ta algun material y algo di creatividad.

Asina ta no desanima ora cu bo mira e jeans sin colo of kibra, ainda por drech'e cu style. Den e articulo aki, nos lo mostra'bo diferente forma pa renoba nan, asina lo bo por pone bo toke personal, of si bo kier, duna nan un estilo 'vintage'.

Prome cu cuminsa, nos ta recorda bo cu bo carson mester ta limpi y seco ora bo cuminsa cu cualkier di e metodonan aki. Sin mas tardamento, aki nos ta comparti cu bo shete triki pa rescata bo jeans faborito.

1. Aplica binager pa rebiba e colo

Con nos por rebiba e colo di un jeans preto? E metodo aki ta increibel, pasobra binager lo yuda bo debilbe e colo di bo carson scur, y fuera di esey, lo evita p'e perde colo ora cu bo lab'e.

Paso:

Mescla den un tobo un liter di binager y otro di awa friu. Bolter bo jeans pa robes. Lag'e week durante tres ora por lo menos. Troce e jeans di e mayor cantidad di awa cu bo mannan y lag'e seca bao sombra.

2. Aplica verf pa tela

Pinta e carson cu ta sin colo t'e miho forma pa hacie keda manera nobo. P'e metodo aki nos ta anima bo pa bo purba tiña bo jeans di un colo diferente n'e original, asina lo bo por combina colo cu bo gusta y e resultado lo ta manera bo a haya paña nobo.

Paso:

Muha e prenda den awa friu. Score e exceso y pone jeans den un tobo. Sigui e instruccionnan di e verf di paña pa pone e cantidad adecua di awa y verf. Muha e jeans durante un ora. Draai e awa cada diescincio minuut p'e tiña full e carson. Saca e exceso di e tiña for di e jeans. Haw'e den awa friu, te ora cu esaki ta cla. Sec'e bao di sombra.

3. Patch cu tela e partinan kibra

Bo por siña drecha bo carsonnan si nan tin

buraco, door di uza patches paden of parti pafo. E patch bo por haya cu paña bieu, of tambe si e ta kibra. Corda cu, hasta, bo por cubri mas espacio fuera di e buraco, no limita y laga bo creatividad guia bo.

Paso:

Corta e exceso di hilo pa evita cu e buraco bira mas grandi. Cose e patch unda cu abo ta prefera. Luci bo jeans cu e patch cu mas bo gusta.

4. Decora e buraconan cu patch borda

Sigur bo a mira varios persona borda e patchnan riba nan maleta of jacket nobo. Ta existi un gran variedad di e patchnan aki, asina ta bo por scoge esun cu mas bo gusta y cubri e buraconan cu bo carsonnan tin.

Paso:

Corta e exceso di hilo for di e buraco. Borda e patch.

5. Borda e saconan kibra

Debi n'e desgaste di bo jeans, e saconan despues sa t'esunnan mas afecta. Eynan nos ta warda placa, carchi y hasta papel cu por perde si esaki yega na tin buraco.

Pa resolve esaki y pa bo jeans luci na moda y hopi chic, e metodo di bord'e ta ideal pa bo pone bo creatividad na prueba. Bo por opta pa borda flor, strea, cruz of pone e inicialnan di bo nomber.

Paso:

Corta e exceso di hilo for di e buraco. Busca hilo pa borda y un hangua diki. Borda e saco cu e modelo cu mas bo gusta. Reforsa e borda p'e saco por resisti miho e peso.

6. Agrega canchi

E metodo aki lo duna bo carson un estilo vintage, sin importa bo tipo di curpa. Danki n'e variedad bo por scoge e canchi cu mas bo gusta, pero nos ta recomeda busca tela resistente, pa evita cu nan por kibra of gasta.

Bo por opta p'e opcion aki, si bo ta desea pa tapa un buraco, pero si bo kier ta pa renoba bo jeans por completo, bo por pone canchi na



un saco dilanti of ariba, riba e parti dilanti of na banda.

Paso:

Bo mester tin na man hangua y hilo di colo di e canchi cu bo scoge. Si bo tin un buraco, borda e canchi door di cuminsa n'e parti kibra y despues na banda. Di otro banda, si bo renoba bo jeans bieu, cuminsa door di borda e canchi na banda te ora bo completa e largura cu bo ta desea.

7. Haci bo carson cortico of short

Si bo jeans ta asina deteriora of tin buraco den e area di e rudianan, lo bo encanta e metodo aki. Bo por corta solamente e parti dañá of ahusta nan na bo gusto, no limita cu e idea di regla e largura di bo jeans, bo por corta solamente te cu e rudianan of te na e bilnan.

Paso:

Marca e largura cu bo lo desea y laga un espacio pa por realisa un dobla. Corta te caminda bo ta prefera. Realisa e dobla parti pafo of parti paden y bord'e. Si bo gusta bo por salta e paso aki pa laga e hilonan dun'e un estilo vintage.

Laga creatividad renoba bo jeans

Renoba bo jeans bieu lo lanta bo creatividad den nubia. No limita y tribi na plasma bo estilo den cada drecha. Si bo gusta tambe bo por combina canchi cu patch of e patch cu tela.

Corda cu bo por uza cualkier di e metodonan aki hasta si bo jeans ta nobo, Tambe bo por reforsa nan prome cu nan kibra y tin buraco. Nunca ta demasiado trempa pa bira creativo y duna mas estilo na nos pañanan. No warda mas, bay busca e carson kibra ey y sin colo y pone man na obra!

Parlamentario Marco Berlis (MEP):

Un biaha mas Marisol inventando storia riba jaarrekening 2019

RECIENTEMENTE nos por a scucha e desesperacion di Marisol Tromp, cu un biaha mas ta fabricando stori-anan negativo riba e maneho financiero responsabel di Minister Xiomara Maduro. Marisol Tromp intencionalmente ta ignora informacion ricibi di Contraloria General (ARA), cu tabata recientemente den Parlamento. Ta p'esey e ta importante pa mi presenta e hechonan y realidad pa pueblo compronde e politica barata cu Marisol ta hungando.

Contraloria General (ARA) a splica Parlamento tardansa di su rapport riba jaarrekening 2019

ARA tabata presente 25 di april 2024 den Parlamento y a informa y splica pakico lo tarda pa traha riba e jaarrekening 2019, cual a wordo entrega na ARA pa minister Xiomara Maduro dia 23 di november 2023. Den e splicacion di ARA, nan a pone hopi enfasis riba nan motibonan y cu esakinan ta haci'e dificil pa nan por haci dos investigacion pareu.

Mirando ARA a comparti tur informacion den detaye cu Parlamento den un "Besloten Bijeenkomst," ta fapranse cu awor Marisol Tromp ta sali grita cu tardansa di jaarrekening 2019 ta e falta di Minister Xiomara Maduro. Marisol atrobe hungando un Politica Dinosaurio?

CAft y IMF tin comprension pa e falta di profesionalnan den e departamento di finansa

CAft den su diferente rapportnan a cubri e tema di atraso di jaarekening. P'esey CAft a aproba un presupuesto pa e departamento di finansa por contrata



mas profesional cu lo por yuda procesa y traha e jaarrekeningnan na tempo. Notabel ta cu den e ultimo rapport di CAft di 10 di juni 2024 riba e uitvoeringsrapportage (UR) di cuater kwartaal di 2023, ta elogia Minister su maneho financiero y cu gobierno a cumpli cu tur norma acorda. E unico critica tabata riba e tardansa di e UR, riba cual contesta di Minister Maduro a splica cu a contrata un profesional y cu esaki lo bay yuda nan completa rapportnan na tempo. Minister di Finansa y su profesionalnan ta demostrando curashi y determinacion pa cumpli cabalmente y esaki ta keda refleha atraves di elogio, aprobacion di instancianan halto y upgrading di e rating di Aruba. Pakico anto tanto critica di Marisol contra minister Maduro? Politica Dinosaurio?

Marisol a sostene e deficitnan historico, Megadebe, KB y CAft

Historia ta demostra evidencia contundente cu Marisol como Presidente

di Parlamento durante e gobierno di Gabinete Mike Eman, a vota "pro" deficitnan historico cu a causa e megadebe catastrofico di nos pais. Ademas Marisol su inaccion contra e maneho devastador aki a causa e ex-minister di Finansa di partido berde pa haya un KB!

Dia cu Marisol mester a denuncia maneho catastrofico di su Minister di Finansa di partido berde, e la grita "pro" y nunca a presenta un mocion di desconfiansa contra dje pa kit'e di trabao! Awe cu presupuestonan ta entrega na tempo, ta cumpli cu tur normanan, tin surplus pa paga e debe cu MARISOL a aproba, e kier sigui hunga un politica Dinosaurio?

ARA probablemente lo keda cla cu su control di e jaarrekening 2019 na october 2024 y sigur lo sa di duna comentario como organo independiente riba e maneho di finansa publico di gobierno di Aruba.

Minister Geoffrey Wever:

A inicia e proceso di certificacion di Oranjestad como e proximo “Capital Culinario” den Caribe



DEN un desaroyo nobo y emocionante, Minister Geoffrey Wever a inicia e proceso di certificacion di Oranjestad pa bira e proximo “Capital Culinario” den Caribe, un reconocimiento valioso di World Food Travel Association (WFTA) cu lo eleva e posicion di nos centro di ciudad. E paso significativo aki ta marca un paso mas di un strategia mas amplio cu tin como meta pa revitalisa Oranjestad.

E “destination certification” di WFTA, esta “Capital Culinario”, no ta solamente un titulo, sino tambe un testimonio di e herencia “culinario” rico y e diversidad di Oranjestad. E proceso lo pone nos cushina local ariba e mapa mundial, promove turismo di cuminda y mehora e experiencia di bishitante.

‘E iniciativa aki ta alinea perfectamente cu nos esfuersonan continuo pa duna bida nobo na e curason di Oranjestad’, segun e mandatario ta comenta.

Strategia di Revitalisacion

E aplicacion pa e certificacion como “Capital Culinario” ta parti di un strategia holistico di Minister Geoffrey Wever pa revitalisa Oranjestad. Nos esfuersonan ta inclui eleva seguridad y garantisa standard halto di limpieza, mehorando e atraccion visual di e ciudad via proyectonan di

embeyecemento, y hisa e accesibilidad di e area. Ta facilitando e regreso di varios departamento gubernamental na nos centro di ciudad pa stimula negoshinan local. Tambe ta pone enfoka riba atrae mas persona, creando asina un ambiente interesante cu por haci mas evento, y festivalnan pa menciona algun. Na final, tur esaki lo haci centro di nos ciudad comercialmente mas viabel.

Un Destinacion “Culinario”

‘E reconocimiento aki lo pone Oranjestad ariba e “mapa culinario” mundial, asina atrae amantenan di cuminda for di tur parti di mundo. Tambe lo duna un plataforma pa nos chef, agricultornan, y productornan di cuminda local pa demonstra nan talento y producto.

E proceso di certificacion ta involvi un evaluacion completo di nos cena culinario, incluyendo e calidad di nos cuminda, e diversidad di nos oferta culinario, y nos compromiso cu sostenibilidad y fuente alimenticio local. Nos ta confia cu Oranjestad lo refleha nos rikesa “culinario”.

E proceso di certificacion ta bay cuminsa, y nos ta ansioso pa sigui informa comunidad di e desaroyonan. ‘Hunto, nos por logra haci Oranjestad un destinacion vibrante, y dinamico’, segun Minister Geoffrey Wever.

Create & Move Camp 2024

Crea door di arte, movimiento, zonido y tecnologia

ESAKI ta di 5 aña consecutivo cu Fundacion Centro Famia Piedra Plat ta organisa campamento pa mucha durante vakantie grandi na Aruba. E aña aki atrobe ta bay tin 2 siman di campamento di diferente edad.

• **Camp 1: Juli 22 – 26 Edad 9 - 12 aña**
Dialuna pa Diabierna di 7:30am - 1:30pm

• **Camp 2: Juli 29 - Augustus 2 Edad 5 – 8 aña**
Dialuna pa Diabierna di 7:30am - 1:30pm

Nos lo tin docentenan, Social worker, lidernan responsabel cu tin EHBO pa cuida y guia e muchanan. Mayoria di actividadnan lo ta den localnan cu aircó. E campamento lo ta enfoca den Arte, Crafting, Pinta, Graphics Design (Canva software), Potret nan, Weganan y Deporte Recreativo. Ta inclui tur material, snack, juice, fruta y lunch.

Danki na CEDE Aruba cu ta yuda cubri parcialmente e gastonan cu asina nos por tuma muchanan di menos recurso tambe na e campamentonan aki.

Pa inscripcion whatsapp: 6995545 / 5691669 /
Tel: 5855544

Adres: Piedra Plat # 50, E-mail: centrofamiapp@gmail.com



Minister Geoffrey Wever:

Fase 1 di Cas Veneranda a termina

MINISTER Geoffrey Wever a tene un reunion recien cu Stichting Monumenten Fonds Aruba relaciona cu e proyecto di renobacion di Cas Veneranda pa discuti e progreso.

E fase di demolicion di e proyecto a wordo completa exitosamente. Esaki no tabata un proceso facil, y a encontra algun sorpresa na caminda. Tambe a siña mas di e historia y arkitektura di Cas Veneranda durante e demolicion. Awo e enfoke ta pa move p'e fase di renobacion.

E proximo fase ta cu e ofertanan di contratistanan mester wordo prepara y entrega, pa despues scoge e contratista. E fecha tentativo p'e comienso di construccion ta plania pa 2 di september.

Minister Wever ta keda compromete pa sigura p'e proyecto ser completa exitosamente y na tempo. 'Proyecto di Renobacion di Cas Veneranda ta di suma importancia y un parti cardinal den e revitalisacion total di Oranjestad. Nos ta



trahando duro pa preserva su balor historico y sigui revitalisa centro di Oranjestad', Minister Wever a declara.



PASEO HERENCIA



COMFORT, FOOD AND COCKTAILS

FOR SHOWTIMES AND ONLINE TICKETING:
WWW.CARIBBEANCINEMAS.COM

 **787-999-3292**

 **@caribbeancinemasaruba**

 **Caribbean Cinemas Aruba**

DOWNLOAD OUR APP

 GET IT ON
Google Play

 Download on the
App Store

Minister Rocco Tjon:

22 miembro di ekipo di brandweer a sali pa Merca

Pa asisti training den cuadro di ICAO



DIASABRA merdia, Minister di Husticia y Asuntonan Social sr. Rocco Tjon tawata presente na Aeropuerto Internacional Reina Beatrix, p'asina hunto cu management team y Sindicato di Brandweer, como tambe Aruba Airport Authority, desea e ekipo di Brandweer un bon biahe y exito cu e volg op opleiding cu nan ta bay sigui na Merca.

E opleiding cu e grupo aki ta bay sigui, ta importante pa nan por wordo certifica, y asina como pais y como organisacion por cumpli cu cierto rekisitonan stipula p'e organisacion internacional di aviacion civil esta ICAO. E plan a wordo presenta na entre otro sindicato di Brandweer pa di e forma ey wak con, na un manera structural, ta bay percura pa por cumpli cu tur e normanan aki.

Esaki ta encera inversionnan cu mester tuma luga riba e parti infrastructural, material y ekiponan, pero tambe riba e parti profesional di esnan cu ta traha na Brandweer. E opleiding aki ta hopi importante, di cual lo bay bin mucho mas.

E punto ta, cu e plan ta encera cierto procesonan cu mester wordo adapta, pa cual motibo e ta importante pa den bon comunicacion cu entre otro sindicato como tambe personal, percura pa adapta cierto procesonan p'asina por cumpli cu e normanan aki.

Por ultimo, e mandatario a desea e 22 coleganan cu ta bay asisti e training aki na Merca hopi exito, y mesora a desea e siguiente grupo di 24 colega exito, cu aki dos siman lo bay sigui e mesun training aki na Merca.



Di estudiante pa influenciado:

22 graduado di IPA cla pa inspira y educa!

RECIENTEMENTE, Instituto Pedagógico Arubano (IPA), a tene su ceremonia di graduacion di año academico 2023-2024. Cu orguyo, IPA ta anuncia cu awor nos enseñansa ta conta cu un grupo di 22 maestro cu lo reenforza nos educacion na Aruba. E graduadonan tin diferente specialisacion, entre otro, Bachelor Nederlands als Vreemde Taal, Movecion y Salud, Pedagogisch Didactisch Getuigschrift y Estudio pa maestro di Enseñansa Primario.

E studentenan cu a gradua den año academico 2023-2024 ta:

Bachelor Nederlands als Vreemde Taal: Gillianny Contreras, Janice Kock.

Movecion y Salud: Lyan Cecilia, Christopher Croes, Robert Dijkhoff, Meloushka Dirks, Myron Ras, Shawn Tromp.

Cursus Pedagogisch Didactisch Getuigschrift: Diana Schotborg.

Estudio pa maestro di Enseñansa Primario: Maryline Boekhoudt, Roxanne Haselhoef, Darlisa Alders, Merveline de Cuba, Gelaine Figaroa, Julaisa Tromp, Roycelynn Fingal, Darinella Geerman, Mariëlle Laclé, Maria Maldonado Pardo, Nashmine Noguera, Litsxya Ras, Charlayne Santos Diaz.

Ta importante pa menciona cu pa prome biaha IPA a otorga diploma di maestro di enseñansa primario cu e specialisacion di 4-12 año banda di algun cu tin specialisacion 4-8 of 6-12 año. Pues 2024 ta marca historia cu e cambio pa un specialisacion amplio haciendo e posibel p'e maestronan aki por traha den cualquier klas di enseñansa primario.

Durante e graduacion, directora general drs. Marilyn Richardson a dirigi palabra n'e publico presente, specialmente n'e graduadonan. El a inicia su discurso bisando e graduadonan cu nan a logra di bira maestro di scol por medio di tremendo dedicacion y perseverancia.

PEN2030 ta para pa, entre otro, responsabilidad comun pa un enseñansa di calidad, 'empowerment', respet, mentalidad habri y curiosidad pa siña. Drs. Richardson a splica cu e graduadonan tin e base aki den nan formacion como maestro, pero awo ta keda na cada un di nan pa keda nutri e balornan aki p'asina carga e vision di PEN2030.

The influencer teacher tabat'e tema di IPA su graduacion. E mensahe cu drs. Richardson a comparti cu e graduadonan ta cu maestro ta un profesion cu tin hopi influencia, un impacto profundo y duradero riba nos bida. Den un mundo domina pa social media stars y tur sorto di sensacion cu



ta go viral, ta facil pa lubida e influencers original cu t'e maestronan! Segun drs. Richardson un maestro ta inspira curiosidad, fomenta creatividad, inculca amor pa siñamento pa bida largo cu ta bay mas leu cu e murayanan di klas, mas leu cu e bukinan cu e ta uza, pasobra e ta forma y moldia character, crea balor y perspectiva. Cada biaha cu un maestro encurasha un mucha of un hoben pa dream big, nan ta sigui influencia otro. Pues e maestro, ta causa e ripple effect aki! Drs. Richardson a termina su discurso bisando e graduadonan: **"Be the influence the world needs!"**

E anochi aki tabata uno hopi ameno, caminda e comunidad di IPA conhuntamente cu famia y invitado di e graduadonan a celebra nan logro den Las Palmas Ballroom di Holiday Inn Resort Aruba.

IPA ta desea tur colega nobo un carera fructifero y exitoso. Nos ta spera cu Todopoderoso lo guia y duna boso sabiduria pa eherce e bunita profesion di maestro cu hopi amor y dedicacion. Pabien na tur graduado y un feliz vakantie na tur e maestronan y muchanan di Aruba!

Trahando hunto pa inverti den e Cuerponan

Polis di Aruba y Corsou a termina master ehecutivo den liderazgo policial

RECIENTEMENTE a tuma luga entregamento di Diploma na 10 agente Policial tanto di Cuerpo Policial Corsou como tambe Cuerpo Policial Aruba.

E 10 agentenan policial a participa pa sigui un estudio di Master Ehecutivo den liderazgo Policial. Esaki a inicia na 2019 na unda cu College van Korpschefs a bini hunto p'asina realisa e estudio aki p'asina inverti den agentenan pa nan por desaroyonan mes como lider. E estudio aki tambe tabata tin un bon cooperacion cu Nederlandse Politie Academie na unda e docentenan Sr. Schreurs como tambe Sra. Van de Zee.

Altocomisario di Polis di Corsou Sr. Ellis como tambe altocomisario di Polis di Aruba Sr. Arnhem tabata presente n'e momento special aki pa duna honor n'e graduadonan.

No tabata un estudio facil mirando varios factor dificil a tuma luga na caminda pero cu determinacion y guia nan a surpasa tur. A entrega 5 agente policial di Aruba di fam Zara, Visser-Boekhoudt, Morel, Vrolijk y Leer y 5 agente policial di Corsou di fam Haile, Rodriguez, Haselhoef, Zwerwer y Aljadidi nan respectivo di diploma.

Cu e diploma aki den man e agentenan policial por reforsa e Cuerpo den liderazgo profesional den departamentonan specialisa p'asina por sigui carga e Cuerpo. Despues di 5 aña Cuerpo Policial di Aruba y Corsou ta asina orguyoso cu trahando hunto por a organisa un estudio policial na Aruba y na Corsou pa nos mesun hendenan.

Altocomisario sr. Arnhem ta orguyoso di mira nos mesun personal sigui crece y desaroya. Trahando hunto so nos por logra cosnan grandi p'e Cuerpo.

Conhuntamente cu College van Korpschefs lo sigui desaroya den e agentenan pa nan por sigui avansa profesionalmente den nan carera policial p'asina por sigui crea lider y un ekipo hoben y nobo p'e futuro di e Cuerpo.



Cu e prome siman sold out

Futura innovation camp 2024 a cuminsa



DIALUNA mainta, 15 di juli Prome Minister Evelyn Wever-Croes tawata presente pa e inicio di e prome siman di e Innovation Camp di FUTURA.

E Innovation Camp di FUTURA ta tuma luga na Prinses Amalia Basischool y durante e camp aki e muchanan ta siña di STEAM (Science, Technology, Engineering, Arts & Mathematics). Esakinan ta habilidad importante pa muchanan desaroya desde un edad jong ya cu e ta prepara nan pa trabounan den futuro. E prome siman di e camp ya ta sold out y e di dos ainda tin un par di cupo disponibel. E camp aki ta pa muchanan entre 8 y 11 aña y e siguiente camp ta di 22 pa 26 di juli.

Prome Minister ta indica cu desde cu Gabinete Wever-Croes a sinta, el a pone innovacion “front and central” den e maneho di su gobernacion. A percursa pa tur aña organisa un of mas Innovation Camp y asina e muchanan di un edad jong por siña kico tur tecnologia por brinda nan.

Prome Minister ta haci un yamada na mayornan di muchanan entre 8 y 11 aña pa trece nan yiu bin diberti, siña y explora nan creatividad na e FUTURA Innovation Camp. E camp ta ofrece nan un experiencia unico y lo educa y inspira e muchanan riba desaroyo sostenibel, diseño, responsabilidad personal, arte, matematica y mucho mas.

“Mi ta gradici FUTURA pa organisa esaki un biaha mas y mi ta gradici mayornan pa inscribi nan yiunan poniendo nan confiansa den e camp aki. Hopi exito na e muchanan”, Prome Minister a expresa.

Pa registra: <https://www.futuralab.org/events/innovation-camp-2024>

131 conhuntamente cu Pan American Development Foundation a estrena e short movie 'My Story'

ARIBA diabierna 28 di juni ultimo, de un sala completamente yen, 131 conhuntamente cu Pan American Development Foundation a estrena e short movie 'My Story'.

Desde luna di maart e aña aki 131 a start cu implementacion di e proyecto 'My Story'. 'My Story' ta un proyecto cu ta stimula empatia entre hobennan local y migrante, y asina aki trata di disminui discriminacion y xenofobia. Danki na fondo proporciona door di e Bureau of Population, Refugees, and Migration (BPRM), 131 conhuntamente cu Pan American Development Foundation por a cuminsa cu implementacion di 'My Story' den 2024.

Na 'My Story' a participa 8 hoben local y 8 hoben migrante. E grupo di hobennan migrante ta consisti di hobennan naci na Colombia, Haiti y Venezuela. 'My Story' a consisti di 6 sesion den cual e hobennan a siña tocante Derecho di Mucha, Igualdad, creacion di arte y actuacion, a crea un pintura y a crea y actua den un 'short movie'.

Durante sesion number 2 e hobennan a bishita e hogar di otro. Durante e bishita aki e hobennan a siña conoce otro y otro su famia. Tambe nan a intercambia di informacion tocante cada un su cultura. E bishitanan aki a crea un amistad bao di e hobennan pa cu otro. Nan experiencia durante e bishitanan t'e inspiracion pa cu e 'short movie'. E 'short movie' a wordo skirbi y actua p'e hobennan mes. Den e 'short movie' 'My Story' e hobennan ta ilustra con nan ta desea pa nan hogar ta, y simultaneamente con nan ta desea p'e hogar Aruba ta.

Durante e estreno di e short movie a hiba palabra e director di 131, e 'program manager' di Pan American Development Foundation Aruba & Curacao y prome minister di Aruba. E estreno a tuma luga den e IMAX Auditorium na The Movies @ Gloria.

Despues di e estreno di e 'short movie' a tuma luga un exposicion di e pinturanan cu cada un di e hobennan a crea. Cada pintura t'e storia individual di cada hoben. E publico presente a acudi n'e exposicion cu a tuma luga ariba e pasillonan na The Movies @ Gloria.

Durante e exposicion e hobennan a duna e publico presente informacion tocante nan creacion, y pa medio di un 'QR-Code' añadi n'e pintura, e publico por a ricibi e ilustracion cu su significacion.

Pa mas informacion tocante 'My Story' por tuma contacto cu 131 via nos website: 131.aw, facebook: <https://www.facebook.com/aruba.131/>, e-mail: 131aruba@gmail.com of telefon 5886138/5884011.





NOW PLAYING



FOR SHOWTIMES AND ONLINE TICKETING, VISIT: CARIBBEANCINEMAS.COM

Fly Me To The Moon

Sparks fly between a marketing executive and a NASA official as he makes preparations for the Apollo 11 moon landing.



FOR SHOWTIMES AND ONLINE TICKETING, VISIT: CARIBBEANCINEMAS.COM

Twisters

Haunted by a devastating encounter with a tornado, Kate Cooper gets lured back to the open plains by her friend, Javi, to test a groundbreaking new tracking system. She soon crosses paths with Tyler Owens, a charming but reckless social-media superstar who thrives on posting his storm-chasing adventures. As storm season intensifies, Kate, Tyler and their competing teams find themselves in a fight for their lives as multiple systems converge over central Oklahoma.



FOR SHOWTIMES AND ONLINE TICKETING, VISIT: CARIBBEANCINEMAS.COM

Despicable Me 4

Gru welcomes a new member to the family, Gru Jr., who's intent on tormenting his dad. However, their peaceful existence soon comes crashing down when criminal mastermind Maxime Le Mal escapes from prison and vows revenge against Gru.



FOR SHOWTIMES AND ONLINE TICKETING, VISIT: CARIBBEANCINEMAS.COM

A Quiet Place Day One

When New York City comes under attack from an alien invasion, a woman and other survivors try to find a way to safety. They soon learn that they must remain absolutely silent as the mysterious creatures are drawn to the slightest sound.

For Showtimes and Online Ticketing: www.caribbeancinemas.com

Fortaleza pa Famia

Legomay tur distraccion, y sigui confia den e promesa di Cristo Hesus

TIN hopi distraccion ta bay rond, hopi cos cu ta tuma luga, pa hala hende su atencion for di e palabra di Dios, asina haci pica importante den bista y bida di hende, y esey ta plan di e diabel.

*Pasobra e palabra di Dios ta bisa nos cu cada ken cu cambia e berdad di Dios pa mentira lo ricibi personalmente castigo pa su eror y specialmente si e no kier arepentí (Romanonan 1:18-32).

*E enemigo ta campeon den smokescreen pa asina desvia hende su atencion pa maldad, pa pone hende perde tempo den discusion, rabia y division den famia mientras cu den tur e cosnan ey no tin bendicion di Dios.

E palabra di Dios ta siña nos lo siguiente:

Pasobra nos mes tambe un tempo tabata ignorante, desobediente, gaña sclavisa, na varios pasion y placer, bibando den malicia y envidia, odioso, y odiando, otro.

Ma ora e cariño di Dios nos Salbador, y Su Amor pa humanidad aparece. El a salba nos, no a base di obranan cu nos a haci den husticia, ma segun su misericordia, pa medio di e labamento di regeneracion, y renobacion pa medio di Spirito Santo.

Kende E a basha ricamente riba nos, pa medio di Hesus Cristo nos Salbador.

Pa nos siendo hustifica pa Su gracia, por wordo haci hered-eronan segun speransa di bida eterno (Tito :3-5)

*Esnan cu a desvia bay tras di palabra di hende lo haya sla y wordo ofendi, pero esnan cu confia den nos Señor Cristo Hesus lo tin forza renoba, pa sigui hiba e Evangelio puro y berdadero tur caminda, pasobra Evangelio ta cariño di Dios pa nos tur Su salvacion, pasobra evangelio di Dios t'ey pa trece salvacion igual pa nos tur.

Si un hende ta desea igualdad lage e buske den e Salvacion cu unicamente Cristo Hesus ta ofrece, pasobra ta para skirbi cu ken cu kere den e Yiu unigenito lo no bay perdi ma tin bida eterna.

Esun cu ta bin for di ariba, ta riba tur, esun cu ta di mundo,



di mundo e ta y ta papia di mundo. Esun cu ta bini for di cielo ta riba tur (Juan 3:31)

E Tata stima e Yiu y a entrega tur cos den Su man. Esun cu kere den e Yiu tin bida eterno, ma esun cu no obedece e Yiu lo no mira bida, ma e furtia di Dios ta riba dje (Juan 3:35-36).

P'esey como cu nos tin un nubia asina grandi di testigonan ta rondona nos, laga nos pone un banda tur strobacion, y e pica cu ta mara nos, asina facil, y cu perseverancia laga nos core e careda cu ta poni nos dilanti, fihando nos wowo riba Hesus, e autor y cumplido di nos Fe. Kende pa motibo di e goso poni Su dilanti, a soporta e sufrimento di cruz, sin haci caso di berguensa y a sinta na man drechi di e trono di Dios.

Considera Esun cu a soporta hostilidad di pecadornan contra su mes, pa boso no cansa y perde animo (Hebreonan 12:1-3).

Ma esun cu persevera te na fin, esey lo ta salba, Y e evangelio di e reino lo wordo predica den henter mundo, como un testimonio na tur nacion, y e ora ey e fin lo bini (Mateo 24:13).

Tene cuidao pa boso curason no ta carga, pa causa di paranda y buracheria e e preocupacionnan di bida y e dia ey no bin diripiente riba boso manera un trampa (Mateo 24:13).

No lubida locual Juan 10:10 ta bisa pasobra E enemigo ta loer.

IN LOVING
memory



The Lord is my shepherd; I shall not want. He makes me lie down in green pastures. He leads me beside still waters. He restores my soul. He leads me in paths of righteousness for his name's sake. - Psalm 23:1-3

With deep sympathy we announce the passing away of our loved one.

Franklin Antonio Priam

Better known as: "Meneer Priam."
*28-11-1951 – †30-06-2024

In the name of his:

Parents:

†Alice Carty
†Neville Priam

Children:

Indira Priam
Stefany Priam

Siblings:

Winston Priam
Winnie Priam
Ahli †Sandra Mirjah
Fazal Mirjah

Mother of his daughters:

Visia Marisela Morales
Elena Judith Oñate

Nieces and Nephews:

Kelly and family, Joshua and family
Steven, Sean, Jahli, Jahmir and family

Related to family:

Priam, Carty, Bryson, Ras, Oñate,
Mirjah, Parker, Johnson, Arrindell, Williams,
Richardson, Jack, Dopwell, Solomons.

Friends:

Cornet, Noordzij-Van der Linde, Lo-fo-san, Edwards,
Ahlip, Viapree, Quant, Alexander, Bontekoe,
Martineau, Sambo, Arrendell, Alexander, Thomas,
Rasmijn, Alvarez, Colina, van Heinigen, de Freitas,
Colina, Robinson, Parsan-Kurvink, Lattig, Da Silva,
Halley, Peterson, Maduro, Colleagues from Pieter Boer
School and Xander Bogaerts.

We apologize if in our grief, we may have omitted any relatives or close friends.

Funeral services will be held on **Thursday 18th, 2024** at Pray Funeral Home from 1pm to 4pm. The burial place will be at the Catholic Cemetery in San Nicolaas.


Instead of flowers, there will be a donation box available.

We apologize that after the funeral services, there will be no condolences accepted at home. Thank you for your understanding.

Cu inmenso tristeza na nos curason pero
agradecido pa tur locual cu e la nifica pa nos, nos
ta anuncia fayecimento di nos querida mama,
wela, ruman, tanta stima:



Mathilde De Cuba-Lampe
Mihor conoci como: "Matty"
vuida di Candido "Chico" de Cuba
★ 16-07-1939 - † 13-07-2024
Acto di entierro lo wordo anuncia despues.



It is with great sadness that we took notice of the passing of

Mrs. Linda J. (Jacqueline) Berkel

Representative Board Member of the Prins Bernhard Cultuurfonds Caribisch Gebied in Sint Eustatius.

Her tireless work in support of the cultural and nature development in Sint Eustatius greatly contributed to creating increased awareness of the Caribbean cultural fund's mission and, consequently, to better cultural governance on the island.

The Prins Bernhard Cultuurfonds Caribisch Gebied has truly lost a beloved colleague and exemplary representative.

Our deepest condolences go out to her family, in particular her sister.
We wish them much strength to bear this great loss.

Board and Staff of the
Prins Bernhard Cultuurfonds Caribisch Gebied



Aurora
Royal Pray
Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa frankil, Pa mi bolbe haña forsa".
Salmo: 23

Nos ta anuncia fayecimento di:

Yolanda Leticia Tromp

*30-04-1948 - †15-07-2024

Acto di entiero lo wordo anuncia despues.



Aurora
Royal Pray
Funeral Home & Crematory

Yora cu m'a bay of gosa cu m'a biba..
Sera bo wowo y resa pa mi bin bek of
habri bo wowo y mira tur recuerdonan
bunita cu a ked'atras..Bo curason por
ta bashi pasobra bo no ta mira mi mas
of bo curason ta yen di amor cu nos a
comparti...Bo por yora sera bo mente,
sinti e bashi y bira lomba of bo por haci
loke semper mi a gusta: hari y gosa bida!
Conta chasco tabata mi pasion.

Cu inmenso tristesa nos ta participa fayecimento di
nos ser stima:

Sr. Vicente José Henriquez

Ex hungador di SV Bubali Sportclub
Ex hungador di Barracuda Billiard Team
cariñosamente yama "Dada of Ten ten"
*15-04-1928 - †12-07-2024

Acto di entiero lo wordo anuncia despues



Aurora
Royal Pray
Funeral Home & Crematory

"Bou di alanan di Dios mi ta sigur" Abo ku ta biba bou
di amparo di Altísimo, ta hospedá den sombra di Dios
Omnipotente, bisa Señor: "Mi refugio, mi forti, mi Dios,
den kende mi ta pone mi konfiansa". - Salmo 91:1-2

Cu inmenso tristesa nos ta anuncia
fayecimento di nos ser stima:

Sr. Thomas P. Quandus

cariñosamente yama "Tom"
*14-11-1939 - †12-07-2024

Acto di entiero lo wordo anuncia despues



Aurora
Royal Pray
Funeral Home & Crematory

"Señor ta mi wardador, mi'n tin falta di nada.
Den cunucu di yerba berde e ta ponemi sosega.
E ta hibami na awa frankil, pa mi bolbe haña
forsa". - Salmo: 23

Cu hopi tristesa pero conforme cu boluntad di
Dios nos ta anuncia cu a bai laga nos den brasa
di Senor nos querida mama, wela, ruman, tanta:

Sra Vda Nelda Wingh-Wever

13-10-1935 - † 09-07-2024
Viuda di George Wingh

Yiunan: Steve & Aurora
Clyve
Belkis & Michael
George
Javline & Maarten

Nieto(a)nan: Cliff
Clint
Kayling
Maeyo
Mandy

Rumanan: Julio, Petra y familia
† Carmen
Lulio, Rosa y familia
Helio, Vilma y familia
Taly, Raiza y familia
Chebio y familia
Heliana, +Lesley y familia
Dalila, Franklin y familia
Alirio, Diane y familia
Orlando, Ankie y familia
Clara, Stanley y familia
Swa y cunanan:
† Julia y familia
Carmen, †Fefe y familia
Eddy, Maria y familia
†Edwina, Enrique y familia

Sobrino y sobrinanan, primo y primanan, ta mucho pa
menciona

Ta invita demas familia, amistades y conocirnan pa uni
cu nos den un acto di despedida di nos difunto stima
cual lo tuma lugar **Diamars, 16 di Juli 2024** di 2'or pa
4'or na Catedral San Fransisco na Playa y despues lo
sali pa Santana na Sabana Basora. E defunto lo reposa
for di 2or di merdia den misa.

Un danki special ta bai pa Dr Jones y staf y personal di
Trinity Quality Care Services.

Despues di entiero nos lo no ricibi bishita di
condolencia na cas.
Nos disculpa si den nos tristesa nos por a lubida
cualquier persona.



Aurora
Royal Pray
Funeral Home & Crematory

Gradicimiento y Invitacion

Yiunan, nieto(a)nan y demas famia di Sra. Vda.
Veronica (Janda) Dirksz-Boekhoudt q.e.p.d. kier
a gradici tur esnan cu di un of otro forma a duna
nan sosten na nos ser keru y na familia.

Sra. Vda. Veronica (Janda) Dirksz-Boekhoudt

Danki na tur cu a expresa nan amor y cariño na
Oma Janda den palabra of via gesto.

Danki tambe pa e bishitanan na cas, e
yamadan y tur bunita mensahenan ricibi.
També danki na tur cu a asisti na e acto di
despedida di nos kerido defunto y e aprecio
pa medio di flor y kransnan ricibi. Boso sosten
tawata un gran consuelo pa nos.

Un danki tambe na Aurora Funeral Home pa
nan atencion. Elfiene Yarzagaray pa e bunita
dedicacion y na Pastoor Andry Soto pa su
oracion y palabranan di consolacion.

Un invitacion ta bai pa asisti na un S.S. di Misa
Diahuebs 18 di Juli pa 7'or PM y Diadomingo 21
di Juli pa 10'or AM na Misa Santa Filomena na
Paradera.

Cu nos kerida Sra. Vda. Veronica (Janda) Dirksz-
Boekhoudt sosega na paz.



Aurora
Royal Pray
Funeral Home & Crematory

Den nomber di su mayornan,

Hilario C. (Lai) y Annastatia R. (Anita) Britten-
Jacobs, su rumannan Maria, Ninita, Sixta,
Betty, Wica, Calito y demas famia ta participa
fayecimento di

Clara Maria Britten

(12 augustus 1939 – 5 juli 2024)

Entiero a tuma lugar den seno familiar.

Danki pa tur e mensahenan bunita y tur e
palabranan amabel.

Plachi pa graaf



Porcelana, granite of marble

- ✓ No ta cobra extra pa letter
- ✓ Servicio Rapido
- ✓ Installacion
- ✓ Material di Calidad
- ✓ Design

☎ 6990495



www.laycro.com



"Señor ta mi wardador, mi'n tin falta di nada. Den cunucu di yerba berde e ta ponemi sosega. E ta hibami na awa trankil, pa mi bolbe haña forsa".
Salmo: 23

Maria Margarita Werleman-Croes

Mihor conocí como Margo
*08 mei 1943 – † 10 juli 2024
Vda di † Estanislao (Edi) Werleman

Yuinan:
Judella Werleman Y Angelo Geerman y juinan Bjorn Werleman
Jouraine Werleman

Nietonan:
Nathan, Clayton, Delvan y Kayden

Rumannan:
†Hilda y †Jan Croes
†Americo (Merco) Croes
†Reina Croes
†Hendrik (Nono) Croes
†Henry (Herichi) y †Chia Croes
†Charles (Chai) y †Reina Croes
Lucila (Chichi) Croes

Subrinonan y subrinanan cu ta mucho hopi pa menshona y famia
Sobre subrino y subrinanan

Swa y cuñanan:
†Ana Maria (Ani) y †Pedro Croes y famia
†Marina (Ina)
Francisca (Chica) y †Henry Henriquez y famia
Luzinda (Chinda) y Harold Burne y famia
Ricardo (Cado) y Julianita Werleman
Max (Mac) y Sabrina Werleman y famia
Oswaldo (Daje) Werleman y famia
Lucia (Goochi) y †Ruben Feliciano y famia

Tata di su nietonan:
Anthony Henriquez y Ivan Ng

Amiga: Aura Croes

Tur su prima y primonan, bisña y conocirnan y personal di San Pedro Paviljoen afdeling Azalea.

Demas famianan:
Werleman, Croes, van der Biest, Henriquez, Ng, Geerman, Solognier, Koolman, Rasmijn, Boekhoudt, Angela, Tromp, Abreu, Campo.

Despensa nos si den nos tristesa nos por a lubida algun famia of conocir di nos defunto stima.

Oportunidad pa condolencia lo ta **diamars 16 di Juli 2024** di 7pm pa 9or pm na Royal Funeral Home.

Ta invita pa e acto di entierro cu lo tuma lugar **Diaranson 17 di Juli 2024** na Kerki Protestant na Piedra plat di 9or pa 10:30 am Sirbishi lo cuminsa y lo termina pa 11or di mainta despues lo Sali bai pa santana Protestant na Piedra plat.

Despues di entierro nos no ta ricibi bishita di condolencia na cas.



"Dios ta amor... y amor ta Dios, maske mi no ta na e mundo aki, tur dia lo mi ta banda di boso Curazon, mi por stens di loke Señor ta hasi". - Salmo 33

Cu inmenso tristeza na nos curason, pero conforme cu Dios Su boltundad, nos ta participa fayecimento di nos querida mama, wela, ruman, tanta stima:

Ilvia Maria Winterdaal-Croes

*25 oktober 1947 – †10 juli 2024
Mihor conocí como "Ita"
Vda di Symon Winterdaal

Na number di su:
Yiunan: Sylvienne Winterdaal
Selkys Winterdaal

Manera yiunan: Shareska Arends
Gerard Croes

Su pret'i wowonan: Genivienne Regales
Ian Dania

Rumannan: Rosly y Roly Werleman
†Renato Croes
†Eddie Croes
†Edwin y Chinda Croes - Tromp
Hubert y Mariana Croes - Giel

Tanta & Omonan: vdo Ildo Croes y †Eta Croes
Essy y Aurora "Lola" Croes
†Bebe y Mama Jojo Croes
†Dufy y Sita Croes
Irena Croes
Shona Ca Vieira y famia na Canada
vda Rosalba Croes na Colombia

Sua & Cuñanan: †Donny & Olga Winterdaal - Tromp
Ludwina Winterdaal
Gladys Winterdaal
Calvin Winterdaal
Lilian Winterdaal
†Rufo y Elena Winterdaal - Tromp
Melva y Martin Tromp
Varida y Johnny Ras

Subrina(o)nan: Cedrick Werleman & Julietta Rasmijn
Juliette Werleman & Renald Thiel
Randolph Werleman & Rosa-Maria Gomez
Kimberly Croes y Tonito Tromp
Howard Croes y Wendely Boekhoudt
Randishlay Werleman y Franklin Gomes

Manera subrino(a)nan: Edmond, Zerlina, Milton Tromp & famia
Melissa, Sharissa Ras & famia
Keyla Winterdaal & famia

Prima & Primonan: Retty, Miriam, Mayra, Randy
Marlon, Giovanni, Marlyn
Glenda, Sharlyn, Sandra
Eric, Julissa, Michelle, Soraya, Johnny
Edric
Andry, Charmaine
Reuben, Dorothy, Valerie
David
Theresita
Buchi, Maiky
Carlito

Ihanan: Marlyn Buys
Randolph Werleman
Andry Acosta

Su bisñanan stima: Angie Kock & famia
Chem Thiel, Ashley, Vicky Dirksz & famia

Amigonan di cas: Netty Williams, Maria Maduro, Maria Geerman-Croes, Sharina Romano-Kelly y famia, Roy Kelly y famia, Judith Fraai y famia na Korsou.

Demas famia: Winterdaal, Croes, Regales, Dania, Arends, Werleman, Winterdal, Bonnet, Vieira, Tromp, Ras, Thiel, Rasmijn, Boekhoudt, Buys, Gomes, Orman, Cheong, Thiel, Acosta, Tjon Sie Fat, van Velzen.

Demas miembronan di Legion di Maria y Blue Army, ex coleganan di Scol Dunun Man.

Demas famianan na Aruba, Carson, Canada, Colombia, Hulanda.
Un gradicimento special di curason na Lola Geerman cu a yud'e durante su enfermedad.

Ta invita pa acto di condolencia cu lo tuma lugar **diamars 16 juli 2024** di 7:00 pm – 9:00 pm na Aurora Funeral Home. Acto di despedida lo tuma lugar **dianan 17 juli 2024** 9:00 – 11:00 am, sigui pa un respons. Cremacion lo tuma lugar den seno familiar.

Deseo di e defunto pa bisti colorman alegre. Nos ta pidi nos disculpa si den nos tristesa nos por a lubida un of otro famia. Despues di entierro no ta ricibi bishita di condolencia na cas. Enbes di manda flor of krans, lo tin un box disponibel pa Koningin Wilhelmina Fonds.



"E lo proteha bo cu su plumanan, y bao su halanan bo lo sinti bo sigur, su lealtad ta bo proteccion". - Salmo 91

A fayece cristianamente nos mama, wela, ruman y tanta:

Sra. vda. Maria Felepina Lewis-Barret

*21-11-1946 - †09-07-2024

Na number di su:
Mama: †Juana (Ninita) Barret-Loefstop
Tata: †Julio Antonio Barret
Esposo: †John Mervin Lewis

Yiunan:
Aquannette Amariane Gunn
Albert Urbain Lewis

Unico nieto, su pret'i wowo:
Brandon Allan Lewis

Rumannan:
†Virgilio (Chombi) Barret
†Carolina (Ina) y †Oscar Gomez-Barret y yiunan
†Cerilio (Ceril) y †Carmen Barret-Kock y yiunan
vda. Petronilia (Nelly) y †Eddy Lourens-Barret y yiunan
†Beatrix (Fona) y †Karel Trappenberg-Barret y yiunan
†Thomas y vda. Olivia Barret-Rene y yiunan
Andres y Rufina Barret-Haayen y yiunan
†Victor (Jany) y vda. Filomena Barret-Trimon y yiunan
vda. Victoria (Toya) Odor-Barret y †Gilbert Odor y yiu

Subrino- y subrinanan, cu ta mucho hopi pa menciona y famia.
Sobre subrino- y subrinanan y famia.

Primo- y primanan, comer y comper, ihanan, amigo- y amiganan, compañoeronan y personal di Happy Days Care.
Ex coleganan di Moises de Marchena & Sons

Demas famianan:
Barret, Lewis, Gunn, Quant, Gomez, Kock, Lourens, Trappenberg, Rene, Haayen, Trimon, Odor, Loefstop y Dorothal.

Despensa nos si den nos tristesa nos por a lubida algun famia of conocir di nos difunto stima.

Acto di entierro lo tuma lugar **dianan 17 di juli 2024** di 1or pa 4or di atardi na Royal Funeral Home. Despues nos lo hiba nos difunto stima na su ultimo lugar di sosiego na Santana Pastoor De Vries na Santa Cruz.
Despues di entierro nos no ta ricibi bishita na cas.



"Señor ta mi wardador, mi'n tin falta di nada. Den cunucu di yerba berde e ta ponemi sosega. E ta hibami na awa trankil, pa mi bolbe haña forsa".
Salmo: 23

Nos ta anuncia fayecimento di:

Felix R Boekhoudt

*30-08-1953 - †12-07-2024

Acto di entierro lo wordo anuncia despues.



Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



noticia@awemainta.com
aviso@awemainta.com